

ᾠωυλόά Βῶwanlín Sísí Hebrifó

Bulu Asón Ina Mu Bi Ámυsu

¹ Bímbí ámu a, Bulu lótsun okpa otsan-otsansu tóí kplá aní anáin bré tsotsotsotó tsun mu onósú atóipúsu. ² Táme séi ánfí ɔyí íbá bəmə onó ánfí mú á, alatóí kplá aní tsun mu Bi ámυsu. Mυgyí ɔhá ání Bulu léle ání ógyi mu ató ní. Mu Bi ánfisu ɔlotsun bwe tógyító. ³ Mυsu Bulu ɔkɔnkpɔnti numnyam təwánkí tsun. Mυgyí ɔhá ání ɔleɬie lian Bulu, ɔde mu asún ámúú íbu túmí ámu pɔki tógyítósú ní. Bréá ɔlɔgyuráa aní tá á, oletsíá ɔsúsú Bulu Otúmípu amu gyɔpɔsu.

Bulu Mu Bi Ámu Lófuá Dun

⁴ Bulu lótsu mu Bi ámu fúá dun Bulu-abəpu fée. Alí kén ɔleha mu dá dun amú ní. Íni lósuná ání ɔdun amú fée. ⁵ Tsúfée Bulu mókúbláa mu abəpu amutó ɔkukukukú kí ɔbée, “Mí B́ gyí fú,
nde nabwé fú Ś.”
Ntée bláa amútó ɔkuku ɔbée,
“Nóbwe fú Ś,
fú é fóbwe mí B́.”

⁶ Íni ɔma asa Bulu ɔbówa mu Bití ámu sísí ɔyító á, ɔleblí ɔbée,

“Mí abəpu fée busúm mu.”

⁷ Tóá ɔleblí tsú mu abəpu amu mú íwi gyí,

“Nabwé mí abəpu fé afú.*

Nabwé mí asúmpó fé ogya plenplen.”

* 1:7 afú ntée ɔɬé. ɔɬé móa afú lɛlian aba Griiki ɔblító.

⁸ Táme ɔlebláa mu Bi ámu mú ɔbéε,
 “Óo Bulu, fú iwíegyí méeta ekekeεe!
 Yilébwe gyí fú iwíegyí akɔnfra.

⁹ Yilébwe futekle. Futekísí lalahε fée.
 Mú sɔ mí, fú Wíε Bulu nalé fú, dá fú ofúli.
 Napú ansigyí wá fútó dun fú aba.”

¹⁰ Bulu asun wanlínhé amu létrá blí ɔbéε,
 “Mí Wíé, fúlówa ɔsulúv ntswiasí bréá fefi ɔyí así.
 Fú onutó ibi fɔrɔbwé ɔsúsú.

¹¹ Mú fée bófwí, táme fú mú fétsiá bré fée.
 Mú fée bóbwε dáda fé tatida.

¹² Fókuntá mú fé tati.
 Fétse mú fé atadiε.
 Táme fú mú futamatse.
 Fú nkpa móómó ɔnó ekekeεe.”

¹³ Bulu mébláa mu ɔbɔrɔ ɔkuku ɔbéε,
 “Tsia mí gyɔpɔsɔ,
 yófun bréá nópu fú alupó bwé fú ayabi oyíkpa.” fé alíá
 ɔlebláa mu Bi ámu.

¹⁴ Ntɔ mee Bulu-abɔrɔ bɔgyi? Megyí ɔhé bɔgyi, Bulu
 tɔwá butɔbúa ahá aní ɔbóhɔ amú nkpa?

2

Nkpahó Kpɔnkpɔɔnkpɔnti

¹ Íni sɔ ilehián aní abékítá ɔnɔkwali asón ámú anílanú
 ámutɔ kínkínkín, méni uméedali aní ibi. ² Tsúfé mbla
 ámú Bulu lówa há aní anáin tsun mu abɔrɔsɔ ámu igyi
 ɔnɔkwali. Íni sɔ ahá ámú bɔwa asutɔ-ɔnlun, bumegyí
 músú ámu benya isɔbití aní ida ɔkpa. ³ Nkálí aní mú abétalí
 srí isɔbití ámu, ní akíná nkpahó kpɔnkpɔɔnkpɔnti ánti?
 Aní Wíε onutó légyankpá blí mú asón. Ahá ámú bonu mú
 ámu é begyi mú iwí adánsiε súná aní bεε, ibu mótó. ⁴ Bulu

onutó é lóbbwe ofúla pú osúna ɔtsan-ɔtsan mu túmitɔ, ɔleha ahá mu Ɖɣe Wankíhé atokiehé bréá iletsiá mu, púdínká ibwi músú ání ɔnɔkwali igyi.

Nkpahó Ɖkpa Osunápú

⁵ Bulu mópu ɔyí ámúbú íbá, anidé mú iwí asún blí ámu wá mu abɔpu ibitɔ ɔbéé, bɔgyíi músú. ⁶ Mboún fé alíá ɔku lówanlín wá Bulu asún ámutɔ ɔtɔneku ɔbéé,

“Óo Bulu, ntɔ nyankpusa gyí, sù fú ansí idɔn musu alí?

Ntɔ nyankpusa gyí, su fúteki musu?

⁷ Bré itinbí kutɔ pé feba mu así dɔn fú abɔpu.

Fɔpu numnyam pú obú dínká musu,

⁸ feha mu ɔde ató féesú gyí.”

Ní Bulu asún ánfí déblí ɔbéé, “Ató fée” á, idesuná ání tɔtɔ mesian ání ɔmedé músú gyí. Séí ánfí á, anumókúnyá wun ání ɔde ató féesú gyí. ⁹ Táme anilawun Yesu. Bulu léba mu así dɔn mu abɔpu bré itinbí kutɔ. Awítale Bulu lówa bwé mú alí, tsúfé ɔleha Yesu lówu ɔhagyíɔha nwunsu. Anílabí ání séí á, Bulu lapú numnyam pú obú dínká musu, iwíɔsun ámúbú olowun, wú ámu su. ¹⁰ Bulu, ató fée Ɖlepú pú músú Ɖkípu amu ɔbékpa mu abí tsɔtsɔtsɔ ba mu numnyamtɔ. Mú su ibu aléá ɔlɔtsun Yesu amúbú ogyi amú Nkpa Ɖhópu amu lowusu há mu ɔlɔfun, méní ɔbóhɔ amú nkpa.

¹¹ Yesu amúbú ɔtɔgyúraa ahá lé amú lakpantɔ ámu mua ahá amúbú alagyúra amu fée babwé Ɖsí ɔkule abí. Mú su ima mu péli ání ɔbétí amú ɔbéé mu apíó. ¹² Ɖlebláa Bulu ɔbéé, “Nékla fú bwehé súná mí apíó.

Nékanfú fú aní offakpa.”

¹³ Ɖleblí bré bámbátó é ɔbéé, “Nópu ansí dínká Bulusu.” Ɖletrá blí ɔbéé, “Kí, mía abí ámúbú Bulu lapúhá mí ámu líí á.”

¹⁴ Ínía anyánkpúsa abí ámúbú Bulu lópuhá mu amu bɔgyi su á, ɔlɔbwe mu iwí nyankpusa fé amúbú, méní ɔbótɔn mu lowusu swíí Ɖbunsám túmí, yíntá mu. ¹⁵ Ɖkpa ánfí pésú

obétalí tsun há ahá á múbú benya lowu ifú, su bəbwe nkpábi amú nkpato fée ámu bégyi iwí ní. ¹⁶ Tsúfé ida yaí aní megyí Bulu-abəpu nkpa əhókpa əleba, mboún Abraham abí-aná. ¹⁷ Íni su ilehián aní əbélian mu apíó tógyítótó, méni əbóbwe amú igyí əhapú dehen aní obówun ahá nwe, wá ənəkwali Bulu ansító. Fówun obétalí bó amú lakpan iwí afədiə há Bulu, obésikíé amú. ¹⁸ Bəso mu ki, mu onutó é əlatsun iwəstəntə. Mú su obétalí gyí ahá aní butəso amú ki é buale.

3

Yesu Dun Mose

¹ Íni su apíó aba aní Bulu latí mli wá əsúsó ayəpútó, mliwu ansí dinka Yesusu. Múgyí Bulu sumbí əyəpú pú mu igyí əhapú dehen amúbú anidé mu iwí asún blí ámu ni. ² Ələwa ənəkwali há Bulu, Bulu léle mu əbée, əbóyo mu agyú má fé alí á múbú Mose ləwa ənəkwali há Bulu, Bulu ləpu mu wóyí fée wá mu ibitə ámu. ³ Táme obú bu Yesusu dun Mose, fé alíá butobú wóyí oyípu dun wóyí ámu. ⁴ Wóyígyíwóyí á, əha léyi mú, támé ató fée əbwepú gyí Bulu. ⁵ Mose ləbwe osúmpú ənəkwali pú əde Bulu wóyísú kí. Ələbláa amú asún aní Bulu əbəlí ekékó. ⁶ Táme Kristo ləbwe obí ənəkwali pú əde Bulu wóyísú kí. Bulu wóyító abí anigyí, ní aniləwa klun kítá mu əkpakítə kínkíínkín yəfun mú ənəmké.

Bulu Ahá Bədə Əkpónó

⁷ Mú su ibu Bulu asún ámuə aní Əhe Wankíhé ləblí əbée, “Nde, ní mlonú Bulu əme a,
⁸ mli máwa asutə-ənlun, fé alíá mli anáin Israelfə bəbwe bréá bəkusú líí Bulusu, sə mu ki dimbí ámuə.
⁹ Inó mli anáin bəso mi ki ni. Ibu mútáá bowun mí bwehé nfí advana (40) kéké.
¹⁰ Íni su nenyá əbló wa amú, blí mbée,

‘Butedáli mí ɔma brégyíbré,
kíná mí asúnsú gyí.’

¹¹ Mú sv nenyá ɔbló ká ntam mbéé,

‘Ní bówie mí ɔkrúnú ɔdakpá unv fiín! Neká nɔtún!’ ”

¹² Mí apíó, mlikí wankláán ání mliɔ ɔkuku méenya klun laláhe ání itamahɔ Bulu gyi, méni umécha mu ɔdali Bulu ɔkiankparu amu ɔma. ¹³ Mboún mliɔi kpla aba ekekegyíseká ɔyí leke, beti mú “Nde,” fé alíá Bulu asun wanlínhé anfi ideblí. Fówun lakpan méemlé mliɔ ɔkuku, há mu ɔwa asuɔ-ɔnlun. ¹⁴ Tsúfé ní akítá aní hógyito kínkíínkín, fé bré ámúbú anilótsɔ hógyi amu yófun mú ɔnómɔ a, ania Kristonyɔ abékan, bwé toku kule.

¹⁵ Fé alíá Bulu asun wanlínhé amu léblí. ɔbéé,

“Nde, ní mlonú Bulu ɔme a,
mlumáwa asuɔ-ɔnlun, fé alíá mli anáin Israelfo
bɔkusú líí Bulusu.”

¹⁶ Amendi lónu Bulu asun blíhé, táme bɔkusú líí musu? Megyí ahá ámúbú Mose lékpa tsú Egyipte ɔsolúsv amu féé?

¹⁷ Amendi Bulu lénya ɔbló wá ní advana (40) kéké? Megyí amú kén lóbwe lakpan, bowu sin dimbísú unv ní?

¹⁸ Amendi Bulu léka ntam há ɔbéé, “Ní bówie mí ɔkrúnú ɔdakpá unv fiín! Neká nɔtún?” Megyí ahá ámúbú bɔkusú líí musu amu? ¹⁹ Múmú ilawánkí aní ání amú Bulu máhógyi sɔ bumɔɔ ɔsolúsv amusu yéda ɔkrúnú.

4

¹ Nhíhé ámúbú Bulu lóbwe ɔbéé, mópu mu ɔkrúnú ɔdakpá há aní ámu itráa da. Mú sv mliha akí wankláán, méni umécha ání mliɔ ɔku oméenya unv yó. ² Tsúfé beda asun wankláán ámu ɔkan súná aní, fé amú, táme bumɔhɔ asún ámusu gyi. Mú sv umɔwa labi há amú. ³ Tsúfé aní ahá ámúbú anilahɔ músú gyi amu obówie mu ɔkrúnú ɔdakpá unv. Ahá amúú bumɔhɔ músú gyi amu mú á, Bulu léblí tswí ɔbéé,

“Nenya ɔbló, ká ntam mbéε,
 ‘Ní bówie mí ɔkpónú ɔdakpá unv fíín! Nεká nɔtón!’ ”

Ibu mótó aní Bulu léhíhíε ɔkpónú ɔdakpá unv yáí tsú bréá ɔlele ɔyí ɔpá. ⁴ Tsúfε bɔwanlín eke síénósí amv iwí asún wá Bulu asun ámutɔ beε, “Eke síénósí a, Bulu léda ɔkpónú tsú mv gyumagyihe féétó.” ⁵ Fé alíá anlanú bɔtsun a, Bulu ɔbéε, “Ní bówie mí ɔkpónú ɔdakpá unv fíín! Nεká nɔtón!” ⁶ Íni désuná aní aku mú bówie unv. Táme ahá ámúú begyankpá nú asun wankláán ámu bumenya unv yó, tsúfε bumobu mv. ⁷ Íni sv Bulu létrá hie eke bámbá, ɔletí mú “Nde.” Nfí tsɔtsɔtsɔ ɔma a, ɔlɔtsun Owíε Dawídsu tóí tsú alí eke ánfí iwí, fé alíá ibu Bulu asún ámutɔ ɔbéε, “Nde, ní mlonú Bulu ɔme a, mlumáwa asutɔ-ɔnlín.”

⁸ Ní amú ɔkparú Yosua léha beda ɔkpónú á, tekí Bulu métrá hie eke bámbá. ⁹ Íni sv ɔkpónú ɔdaké kuá ina ɔtsan ida gyo Bulu ahá, fé alíá Bulu léda ɔkpónú eke síénósí amv. ¹⁰ Tsúfε ɔhá aní olowie ɔkpónú ɔdakpá unv é ladá ɔkpónú tsú mv é mv gyumagyihe kugyíkutɔ, fé alí ámúú Bulu léda ɔkpónú tsú mv kle kugyíkutɔ ámu. ¹¹ Mú sv mliha abɔ mbódí awie ɔkpónú ɔdakpá unv, méní anitɔ ɔkuku méésin ɔkpatɔ fé alí ámúú Israelfɔ ámu bɔwa asutɔ-ɔnlín, besin ɔkpatɔ ámu.

¹² Tsúfε Bulu asún ámu ibu nkpa, itɔyó agyómá. Ibu ogyá dun ɔdayí iya anyɔ kugyíku. Iteká ɔha alu yówie mv ɔkláa pú mú ɔhε ofíakpa, mv ntsakpá pú mv awú nfɔtɔ. Itegyí aní agywun pú tóá anitekile tsú aní klɔntɔ asún. ¹³ Tɔtɔɔtɔ tamanjáín Bulu! Tógyító da yayá mv ansító. Mu abóyóbu aní tsiátó akúnta kugyíku súná ní.

Aní Bulu Igyí ɔhapú Dehen

¹⁴ Aníbu igyí ɔhapú dehen kponkpontí aní aladá fá ɔsúsú yó ɔbu Bulu wá. Mvgyí mv Bi Yesu. Íni sv mliha akíta

Yesu anfi andé mu iwí adánsie gyí anfito kínkíínkín. Animádunkí ansí musu. ¹⁵ Tsúfé mu mú omegyí óhá ání omóonu aní así ní animétalí gyí iwísu. Ogyi óhá ání boso mu kí okpagyíokpasu fé aní, táme omobwe lakpan ekekeke. ¹⁶ Íni su mliha awa klun, ayó Awitolepu Bulu obía así. Fówun obówun aní nwe, wá awitole, kpá aní aní ohíánke.

5

¹ Lé butélé igyí óhapú dehen okugyíoku tsú mu aba anyánkpósato, otelí amú nwun Bulu ansító. Ótòhò atò hahé pú lakpan afodie-abótó tsú amú wá, púhá Bulu igyí. ² Mu onutó é otamatálí gyi iwísu bré tsotsòtsòtò. Mú su otenyá klun há ahá ání bumeyín olala pú amúá bafwí okpa. ³ Mú su ilehián ání óbóbò afodie há mu onutó lakpan, fé aliá otóbó há mu ahá. ⁴ Óhaa tamawá mu iwí numnyam óbé, Bulu igyí óhapú dehen mugyi. Mboún Bulu tétí óha, bwé mu mu igyí óhapú dehen, fé aliá ólobwe Aaron.

⁵ Ali kén Kristo onutó é mówa iwí numnyam ání Bulu igyí óhapú dehen mugyi ní. Mboún Bulu lébláa mu óbé, “Mí Bí gyí fú.

Nde nabwé fú Sí.”

⁶ Bowanlín wá Bulu asún ámu otineku é be, Bulu óbé, “Bulu igyí óhapú fúgyi bré féétó, fé Melkisedek.”

⁷ Bréá Yesu tsie nkpa ósulúv anfisv á, ólòpu kokóli múa isú bó mpái, kplón kúklúkú, pú mu atò kulíhé tswi Bulu ání óbetalí hò mu nkpa ansító. Mu iwiasibá sum Bulu su Bulu lónu mu mpái. ⁸ Ibv mútósá Bulu mu Bi ogyi mú, táme ólòtsun iwíwíntò asa óletalí bí aliá Bulubu ihíé igyí. ⁹ Íniá ólobwe tógyítósá Bulu lówa mu bwe su á, olemlí okpa ání ahá ání butobú mu féé bótsun músú nyá nkpahóó ání itamatá. ¹⁰ Bulu léle mu súná ání ogyi mu igyí óhapú dehen, fé aliá óleyaí Melkisedek.

Mlumási Hógyi Amuto

¹¹ Mbu asún tsòtsòtsòá abéblí tsú Melkisedek asún ánfí iwí. Táme mó asilé súná mli ibówa ònlun. Tsúfè séi á, mlitráa mlumédé asún así nu ósasú. ¹² Tekí bófun alí bré ánfító á, mlilamlí asunápú, táme mlilétrá hián òhá ání obósuná mli atò gyankpapvá íbu Bulu asún ámuto. Múgyí, mliléhián atosúanheá ìlòpòn fé nyópu-ntsu. Megyí múá íbu ònlun fé atò wihé ntéé atogyihe onutó. ¹³ Táme kebi bòbwe tónyópú. Omeyín tóá gyí yilébwe. ¹⁴ Òhande tégyi tóá íbu ònlun, tsúfè alatsuntsun ntóbító kí, alakásí bí yilé múa lalahe.

6

¹ Mó sv mlumátrá bitía aní ayabi ya óma. Mliha akasi múá íbéha aní abóyo nkpa, asi Kristo iwí atosunáhé gyankpapv amuto plá laplá. Mehián ání abétrá suná ató tsú Bulu hógyi pú kluntòdamlí tsú bwehéá itetí lowu iwí, ² atosunáhé tsú asúbò, íbì pvdínká óhasú,* afúlikvsó pú Bulu asóngyí eke tráhe amv iwí. ³ Ní Bulu lótsulá á, mómú múá íbéha abóyo nkpa sòón abósuná mli nya.

⁴ Ní ahá ání bawun Bulu wankí amv kí, badá ósúsú atokiehé ònó kí, banyá Òhe Wankíhé amv é kí, ⁵ badá Bulu asún ámúú íbu alé ámv pú bré ámúú íbéba amuto túmi ònó kí, ⁶ mó óma bedida hógyito á, butamatálí trá damlí klunto. Tsúfè amú onutó ámv trá bode Bulu mv Bi ámv da mántá oyikpalíhesu, tsú mó líí beé, ahá bubwéé mv ahinlá ní.

⁷ Anyánkpúsa akv bugyi fé ósolúbá itonu ntsuá nyankpv détswíe wulí músú, ató tówá alé, wá labi há ahá ámv sv ámúú bòdò mó ámv. Bulu toyúlá alí ahá ánfí odu. ⁸ Táme akv é bugyi fé ósolúbv ání tunkpa múa awu aná tòkwe músú,

* 6:2 íbì pvdínká óhasu igyi amándíé ání ópasua ahande butòbwe púwá ahá ání balé há gyuma kv gyí ópasua ámuto òwunlín, ntéé pútsá ahá ìlò, ntéé púkúlí Bulu Òhe Wankíhé há amú.

butamawá labi. Ní bumekı wankláán á, Bulu obólwı́ amú, wá amú ogyá.

⁹ Táme apı́o adwepú, ní nde íni blı́ ó á, opúni medé mí tsiı́. Tsúfé nyin ání mlı́dé ato wankláán bwe, idesuná ání Bulu lahó mli nkpa. ¹⁰ Tsúfé tóá ida okpa Bulu tóbwé. Oméetan mli gyumagyihe pú odweá mlılalé súná mu tsú mu ahátsato, mlı́tráa mlı́bu mósú. ¹¹ Nhı́é ndeklé mbéé, mlı́to okugyı́oku obówa iwı́ owonlın, bwé mú yófun mú onómó, fówun itó amúb mli ansı́ dın mósú ámu ibéba mótó há mli. ¹² Mmedékléá mli mlı́ ɔ́hétó awolı́yopú. Mboún mlı́kası́ ahá amúb amú hógyı́ pú amú ı́klunya su amú ı́bi béda itó amúb Bulu léhie yáı́ ámu.

Bulu Léduńká İbwi Tóá ɔ́lehı́e Yáısó

¹³ Bréá Bulu léka ntam há Abraham a, ɔ́haa má unvá ɔ́dun mu Bulu. Mú su mu onutó iwı́ olópuká ntam. ¹⁴ ɔ́béé, “Nekáse, néhie yúlá fú. Néha fú abı́-aná békłéı́ tsotsotsol!” ¹⁵ Abraham lénya klun. Mú su olenya itó amúb Bulu léka ntam obéé méha mu amu. ¹⁶ Nı́ oku obéka ntam a, ɔ́há ání ɔ́dun mu idá otópóká ntam amu. Isuna ání nweéngyı́ kuku má mu ntam amu iwı́. ¹⁷ İni su bréá Bulu dékléá obósuná ahá amúb ɔ́lehı́e tó ámu há ámu ání oméetse mu agywun ekekeke á, ɔ́letanv mu iwı́. ¹⁸ Bulu tamawá afunu! Mu tó amúb ɔ́lehı́e yáı́ ámu, pú ntam amu igyi atoku anyo ání uméetse ekekeke. İni su anı́ ahá amúb anı́lasrı́ tanv mu amu anı́bu tóá abópı́wá iwı́ owonlın, akı́ta tó amúb anı́de okpa kú amuto kınkı́ınkın. ¹⁹ Anı́ okpakı́ anı́fı́ lakıtá anı́ yáı́ fé alı́a ɔ́tan tekıtá obu lı́ı́. Anı́ okpakı́ anı́fı́ tekpa anı́, anı́tatsun tati amúb isı́an ɔ́súsó ɔ́wankı́kpátó ɔ́wankı́kpá obu-onó amuto wı́e mótó. ²⁰ Anı́ su Yesu lagyankpá yó obu obu amuto unv dodo. Alamlı́ igyı́ ɔ́hapú dehen ání obu unv bré féétó há anı́ fé Melkisedek.

7

Bulu İgyı́ ɔ́hapú Melkisedek

¹ Melkisedek anfi á, owíe ogyi Salem. Ǫlɔbwe ɔsúsúúsú Bulu amu igyí ɔhapú. Eke ɔku Abraham lóyókɔ awíe abaná aku isá, gyí amósú. Bréá oleyinkí ɔbá á, olefia Melkisedek. Melkisedek lóyulá mu. ² Abraham léye atóá olenya tsú isá ámutɔ idú, ɔlɔpu idúsí há Melkisedek. Idá anfi así gyí, “Yilébwe Owíe.” Mu idá kule é gyí “Iwilwii Owíe,” tsúfé Salem así gyí, “Iwilwii.” ³ Bulu asún meblí asvansu tsú Melkisedek akwípu ntée mu ulíntɔ, mu kwí ntée mu lowu iwí. Ǫlelian Bulu mu Bi ámu. Bulu igyí ɔhapú ógyi bré fěétó.

⁴ Mlíki alíá Melkisedek gyí ɔha kɔnkpɔɔnkpɔnti ɔku. Aní náin Abraham kúráá léye mu atóá olenya tsú isátó idú, pú iku kule há mu. ⁵ Mose Mbla léha Lewi abí-aná, bvgyi igyí ahapú ámu ɔkpa ání buhóɔ ató yée idútó kule tsu amú ahá Israelfó wá. Ibu mútó ání Abraham abí-aná amú é bvgyi. ⁶ Melkisedek anfi mótsú Lewi abí-anátó, táme ɔlɔhɔ Abraham ató yée idútó kule, yúlá Abraham mboún ámú Bulu léka ntam há ámu. ⁷ Nwéngyí ma mú iwí ání ɔhá ání otoyúlá dɔn ɔmúvá budeyulá. ⁸ Yudafo igyí ahapú ámú butɔhɔ Israelfó ató idútó kule amu butowú, táme ɔlɔhɔ Abraham atóyetɔ idúsí anfi mú trá otsie nkpa fé alíá Bulu asún wanlínhé amu déblí. ⁹ Ní animóɔwa afunu a, abétalí blí aníaa, bré ámú Abraham lópu mu ató idútó kule há mu amu a, Lewi abusuan ámú butɔhɔ Israelfó ató idútó kule amu é beka mú tɔn Abrahamsu. ¹⁰ Tsúfé Lewi bu mu nain Abraham iwíɔ, bumákúnyá kwí mu asa mu nain lópu mu ató idútó kule há Melkisedek.

¹¹ Ibu mútó ání Mose mbla ámu léblí ání Bulu igyí ahapú butsúu Lewi abusuantɔ. Ní bétalí há ɔha ɔbófun a, teki Bulu métrá le mu igyí ɔhapú bámbá ání ogyi fé Melkisedek, omotsú Aaron abusuantɔ. ¹² Ní betse igyí ahapúle mbla ámu a, múmú ilehián ání bétse Mose mbla ámu é. ¹³ Tsúfé aní Wíe anfi anidé mu iwí asún blí anfi otsú abusuan bámbátó. Abusuan ánfíto ɔhaa mókúsum afɔdié-asubwi amusu ki. ¹⁴ Ǫhagyíɔha yin ání Yuda abusuantɔ aní Wíe

anfi otsú. Mose méti abusuan ánti idá bréá òde abusuan oduá bóbwe Bulu igyí ahapú iwí asún blí.

Bulu Igyí Ohapú Bambá Ání Ogyí Fé Melkisedek

¹⁵ Bulu mbla ánti tsée latráa wankí aní tsía, tsúfé igyí ohapú bábmbá labelé iwí òwan fé Melkisedek. ¹⁶ Mbla dada amv ilosuná ání Lewifó nkule òbwée igyí ahapú, táme megyí bee mv anáin botsú Lewifóto sù òlobwe igyí ohapú. Mboún mv nkpa ání umóomò ònó ekekeeke túmitò óna òlobwe igyí ohapú. ¹⁷ Tsúfé bōwanlín wá Bulu asún ámutò bee, “Bulu igyí ohapú fúgyi bré féétó, fé Melkisedek.”

¹⁸ Idesuná ání balé igyíha mbla dada amv ibwi, tsúfé umōwa ogyá, umōwa labi é. ¹⁹ Tsúfé Mose mbla ámv métalí bwé tótòtò ifun. Séi á, Bulu lapú aní òkpakí wankláán ání idun mbla dada amv yáí mú otsiákpá. Múá ibékpá aní mantáa Bulu.

²⁰ Bulu léka Yesu iwí ntam ání òbóbwe mv igyí ohapú bré féétó. Omeka igyí ohapú bábmbá òkòkòkò iwí ntam.

²¹ Yesu iwí ntam ání òleka bréá òlobwe mv igyí ohapú gyí, “Mí Bulu, naká mí iwí ntam ání igyí ohapú fúgyi bré féétó.
Mméelatse mí agywun!”

²² Ina ntam anfi sv Yesu labóbwe òma òlípú há Bulu nhíhíé ání ihíé bv alé òn nhíhíé dada amv.

²³ Bulu igyí ahapú ámvú betsiá nhíhíé dada amv ònó ámv bohíé butso, tsúfé butowú sí agyómá ámv tswi. ²⁴ Yesu mú sv unv bré féétó. Mú sv mv Bulu igyíha mōomò ònó ekekeeke. ²⁵ Mú sv òtetálí hō ahá ání butòtsòn mvsv ba Bulu wá féé nkpa plíplíplí. Tsúfé otsie Bulu wá, òde mv kokóli amú nwunsv bré féétó.

²⁶ Yesu gyí Bulu igyí ohapú dehen onutó ání anidéhíán ni. Mv iwí letn, tsitsa koku ima mv iwí. Lalahe kòkòkò é ima mutò. Bulu léle mv lé lakpan abwepú òkpasv, há mv otsiákpá fváhé òsúsúsú. ²⁷ Imehián ání mv mú

obégyankpá bó mu lakpan iwí afòdié, fé igyi ahapú dehen atráhe amu. Amú mú betsiá bó há amú onutó lakpan ekekegyíéke, asa bòbò há ahá atráhe. Òtsáwule pé mu mú òlòbò afòdié há ahá fée lakpan, bréá òlòpυ mu iwí bó afòdié ahá fée nwunsv. ²⁸ Mose mbla léha ahá ání bapən bəbwe Bulu igyí ahapú dehen. Táme mbla ámu əma a, Bulu léka ntam lé mu Bi. Alahá mu Bi ámu labwé mu igyí əhapú dehen ání òlòfun bré féeťó.

8

Ani Igyí Əhapú Dehen

¹ Asún ání ndeblí fée gyí, ambu Bulu igyí əhapú dehen ání ógyi alí, otsie Bulu Otúmípv amu obiá gyəpvsv əsúsú.

² Əde Bulu igyí ha Əwankíkpátə Əwankíkpá onutó ání ibu əsúsú unv. Mú mú á, Bulu onutó léyi mú, megyí nyankpvsa.

³ Bulu igyí əhapú dehen okugyíəku á, mu agyúamá gyí, əbópυ ahá ámu atə hahé pv amú afòdié-abətó há Bulu. Íni sv ílehián ání aní Bulu igyí əhapú dehen Kristo é obénya tóá əbópυhá Bulu. ⁴ Ní əsulúv anfvsv əbv a, tekí əmóəbwe Bulu igyí əhapú ekekekeke. Tsúfé Bulu igyí ahapú onutó bvbv unvá btehá Bulu igyí Mose mbla ənó. ⁵ Igyí ahapú amu bvtətswe Bulu igyí əhakpá ání ílelián əsúsú tati-obu ámu. Íni sv Bulu léda Mose əlá bréá əbóəbwe tati-obu ámu əbé, “Kí ání fóbwe tógyító fé obu ámuób nele súná fú íbvsv unv ámu odu pépéépe.” ⁶ Táme Yesu igyíha agyúamá ámuób Bulu léha mu amu léhié fúá dvn əsulúsv igyí ahapú dehen amu klé. Ntam pəpwe ámuób íbv ania Bulu nsiné, Yesu gyí mú əma əlúpú amv é íhié bv alé dvn ntam dada amv. Tsúfé əlehié atoyiléá móəbwe há aní wá múťó.

⁷ Ntam gyankpavv amv unəfun. Ní uləfun a, tekí nyəəsv metrá hián. ⁸ Táme Bulu lówun ání anyánkpvsa bumebí bwé. Mú sv əleblí əbé, “Éke əku íbá. Mí mlí Wíe déblí.

Mía Israelfó pú Yudafó abéka ntam pəpwe.

⁹ Imóəbwe fé mú á múú iletsiá mía amú anáin nsuné,
bré á múú nekítá amú ibi, kpá amú dalı Egyipte
əsolúsu ámu.

Tsúfé bomegyi mí ntam amusu.

Íni su nesi amú iwı há amú.

¹⁰ Ntam anfi obétsiá mía Israelfó nsuné
eke ámu ni. Mí mli Wıe débli.

Nópu mí mbla wá amú nwuntə,
nówanlín mó dínká amú klonsu.

Nóbwe amú Bulu,
amú é bóbwe mí ahá.

¹¹ Amótó əkuku méétrá suná mu pio,
ntéε mu ba əbéε,
əbí Bulu.

Tsúfé amú féé bébi mí.
Tsú nyebísú yófun ahandesu.

¹² Nési amú lakpan kíé amú.
Mméétrá kaín lalaheá babwésú.”

¹³ Ní anı Wıe dé ntam pəpwe iwı asún bli á, múmú
ilosuná ání dada amu itráa ma labi mu ansító. Tóá uladan
bwe dáda a, wu itowú.

9

Əsolúsu Múa Əsúsó Bulusúm

¹ Bulusúm mbla letsiá Bulu ntam dada amutə. Bəbwe
tati-obu ání bósum Bulu mútú əsolúsu nfi. ² Bəpu
tati tin tati-obu ámu ənó, bəpu ikule é ká mútú. Beti
obu gyankpəpu amutə beε, Əwankíkpa. Əkandıe-oyı ání
butonywé nkandıe bian músú pú əpúnú ání bodobodoá
bapúhá Bulu igyı idın músú bu inu. ³ Obu nyəəsı amúb
ıbu tati nyəəsı amu əma amutə butetı, Əwankíkpatə
Əwankíkpa ni. ⁴ Sika pəpə afədıe-asubwi bu inu. Bulu
Ntam-dáka ání bəpu sika pəpə píatá mú iwı féé é itsie inu.
Butəwá əhıén ogyá afədıe-asubwi ámusu. Atoku asa búu

Bulu Ntam-dáka ámutò. Múgyí, sika pεpe òlankabi ání atogyihe kuá beti mú mana bu mótó, Aaron oyi yiahé amúú ìlòpói ámu pú abwi pétéplé anyò amúú Bulu lówanlín mu mbla dínká mósú ámu é bu mótó. ⁵ Bòbwe Kerubim anyóá búbu numnyam, bugyi ntobí akvá búbu abámba dínká ntam-dáka ámu obuasusu. Amú fée betunkí amú abámba fia aba, ilobun dáka ámusu. Amú nsiné unv Bulu tesí ahá lakpan kíé amú ní. Táme megyí séi abéle asún ánfí asi.

⁶ Alí bela ntobí ámu yái unv ní. Bulu igyí ahapú ámu butowíé obu gyankpapu, igyi Òwankíkpa amutò ekek-egyíeke yóyo amú agyúamá. ⁷ Bulu igyí òhapú dehen pé towíé obu nyòosi, igyi Òwankíkpatò Òwankíkpa amutò. Òtsáwule pé otowíé unv ofító. Ilehián ání òbòpu òbwi obugya ání òbòpubó afòdié há Bulu mu onutó nwunsv pú ahá lakpan ání bòbwe, bumeyín sv ya unv. ⁸ Tóá Òḡe Wankíhé amu désuná tsú ntobí ánfí iwí gyí, Òwankíkpatò Òwankíkpa unv òkpa lefin wa amú bréá tati-obu ámu gyí amú Bulu òtswékpa. ⁹ Íni igyi atosuanhe há nde oyi keke. Idesuná ání ibu mótóá butòpú atò hahé pú afòdié-abòtó há Bulu igyí, táme iméetalí há mú òhapú ámu klvn isi mu ipón ha ání mu iwí latin tsú mu lakpantò. ¹⁰ Tsúfé ntobíá igyi, atogyihe, atonuhe pú amándíé ání nyankpusa tòpúgyóra iwí keke mbla ámu losuná. Bulu lóbwe mbla ámu fée há nyankpusa, ání òkíta mótó bòfun bré ánfí alabwé òkpa pòpwe ání bòpubwé mú ánfí, anuméetrá bwe dáda amu.

¹¹ Kristo labòbwe Bulu igyí òhapú dehen há atò wan-kláán amúú ìlaba ámu. Mu tati-obu ání òbu mótó bu òsúsú. Unv tati-obu ámu òvn òsulúsv klé, ìlòfun òvn mú é. Megyí nyankpusa lóbwe mú mú, imotsú oyi ánfíto é. ¹² Megyí atròkpa pú nnantwie yínhé obugya Kristo lópuya Òwankíkpatò Òwankíkpa unv. Mu onutó obugya òlòpuya unv, òlòpvká aní nwunsv ikò òtsáwule pé, anilénya nkpa ání itamatá. ¹³ Mose mbla ámu ònó á, akpaláa pú

nnantswie obugya pú ɔnantswiebí ání bawá mu ogyá, alahɔ nsúó butowúnnya wolí ahá ání ifin lada amó, púgyóra amó. ¹⁴ Ní betalí bude mbwɪ obugya kóráá putin ahá iwɪ á, ntogyi sv Kristo obugya méetalí tun ahá iwɪ dun? Kristo lótsun Ɔhɛ́ ámúbú ibv unv bré féé ámvsu, pú mu iwɪ lé mbusuo ání ulɔfun há Bulu. Mu obugya amv ibétun anɪ kluntɔ tsú bwehéá ibékpa anɪ wá lowutɔ iwɪ, ménɪ abétalí súm Bulu Ɔkiankpavv amv.

¹⁵ Ínɪ sv Kristo gyí ntam pəpwe ání ɔbv Bulu mva anyánkpósa nsúnɛ ɔma ɔlúpú, ménɪ ahá ámúbú Bulu latí ámv bénya ató ámúbú itamayíntá, ɔlehɛ yáí há amó ámv. Tsúfɛ́ Kristo lowu ámv ilahá amó bagyi iwɪ tsú lakpan ámúbú bəbwe bré ámúbú bubv ntam gyankpavv amv asɪ ámvɔ.

¹⁶ Ní ɔkv ɔwánlín nhɪhíé há mu atótó yéé tswɪ a, otowú asa itɔyó agyómá. ¹⁷ Tsúfɛ́ nhɪhíé ámv uma labi bréá ɔhá ámv onutó tsie nkpa. Mu lowu ɔma itɔwá labi. ¹⁸ Ínɪ só bəpv obugya sí Bulu ntam gyankpavv amv ésú asa ulɔyɔ agyómá ní. ¹⁹ Tsúfɛ́ bréá Mose lékla mbla ámv féé súná Israelfɔ tá á, ɔlɔpv ntsu fráa nnantswie pú akpaláa obugyatɔ, pú kufa iwɪ imi pepe mva ifá kuá butetí mú Hisop wúnnya obugya fráhe amv wólí mbla ɔwulú ámv pú ahá ámv féésú. ²⁰ Múbú ɔleblí ɔbéé, “Obugya ání ndepvsí ntam ání Bulu laká há mɪsv ní.” ²¹ Alɪ kén ɔlɔpv obugya amv kv wúnnya tati-obu pú ntobí ámúbú butɔpútswe Bulu ámv féésú nɪ. ²² Lélé́ mú Bulu mbla ámv ɔnó á, abétalí blí aniaa, obugya butɔpúgyóra tógyító. Ní buməpv obugya lé mbusuo á, lakpansikíé tamaba.

Kristo Afɔdié Télé Anɪ Tsú Lakpantɔ

²³ Alɪ ilehián ání bóbwe amándíé ánfɪ púgyóra ntobí ánfɪ ígyi fé ɔsúsú klé amv nɪ. Táme ɔsúsú klé amv ilehián afɔdié ání híé dun ɔwulúsv klé anfi. ²⁴ Ínɪ só Kristo mówie tati-obuá nyankpusa lópv mu ibɪ bwé, igyi fé ɔsúsú klé amv

oduto ní. 25 Ɖwəpυ mu iwɪ yóbɔ afɔdiɛ tsenyɔ-tsesa, fé alɪ ámúbú Bulu igyí ahapú dehen amu butɔpú mbwɪ obugya ya ɔsulúsv Ɖwankíkpráto Ɖwankíkprá unv offígyíofí ámu. 26 Ní alɪ igyi á, tekɪ ilehián ání Kristo obétsiá wun iwɪɔsun wú tsé dú tsé lafa, tsú bréá ɔyí lefi asɪ ɔpá. Mboún alalé iwɪ ɔwan ɔyí ɔnómɔbí ánfɪ, pú mu iwɪ bɔbɔ afɔdiɛ ɔtsáwule pé púlé ahá tsú amú lakpantɔ. 27 Igyi fé alɪá ida yáí ání ɔtsáwule pé ɔha obówu. Mú ɔma a, Bulu obégyi mu asón. 28 Alɪ kén Kristo lópv mu iwɪ bó afɔdiɛ ɔtsáwule pé, púlé ahá tsɔtsɔɔtsɔ tsú amú lakpantɔ ní. Mú sv ní ɔlé iwɪ ɔwan otse nyɔɔsi a, imehián ání ɔbétrá bwe tɔtɔ tsú lakpan iwɪ. Mboún ahá ání buhié butsie bogyo mu nkpa ɔbá bɔhɔ.

10

1 Alɪ ámúbú Mose mbla léle súná ání buvúha Bulu igyí amu ɪlelián mú ámúbú ɪbéba amu keke. Mú onutó ámu Kristo labɔbwe á. Afɔdiɛ oloku ɔkulɛ amu betsiá bó há Bulu offígyíofí. Táme imetalí há ahá ámúbú butɛbeha igyí amu abufɔn Bulu ansító. 2 Ní ɪletalí tin amú iwɪ Bulu ansító ɔtsáwule pé á, tekɪ besi afɔdiɛ ámu bɔ, amú klɔn é ilesi amú ipón ha ání babwé lakpan. 3-4 Tsúfé nnantswie yínhé pú atrɔkpa obugya méetalí lé nyankpusa tsú mu lakpantɔ ekekekeke. Mboún ha itehá mu ɔtekáin mu lakpansv offígyíofí. 5 Ɔni sv bréá Kristo ɔbá ɔyító á, ɔlebláa Bulu ɔbéɛ,

“Megyí atɔ hahé múa afɔdiɛ fúdedunká.

Mboún ɔyulúv fela yáí mí.

6 Fú ansí megyi mbwɪ tóhé

pú lakpan afɔdiɛ iwɪ.

7 Múbú neblí mbéɛ, ‘Mí Bulu, mí ní.

Ne bá bɔbwe fú apé,

fé alɪá bɔwanlín mí iwɪ asón wá
fú ason wanlínhé amutɔ.’ ”

⁸ Olegyankpá blí ðbéε, “Megyí afòdiε m̀ba atò hahé, mbwi t̀héhé p̀ú lakpan afòdiε f̀údedunká. F̀ú ansí megyi m̀ú iwí.” Òleblí alí, támε mbla òkpasó ilehián ání b̀óbwe m̀ú. ⁹ M̀ú òletrá blí ðbéε, “Mí Bulu, mí ní. Nεbá b̀óbwe f̀ú apé.” M̀ú sv Bulu lalé afòdiε dada amu ibwi, p̀ú Kristo afòdiε ámu wá m̀ú otsiákpá. ¹⁰ Yesu Kristo lóbwe Bulu apé, p̀ú mu iwí b̀ó afòdiε aní nwunsv òtsáwule pé, há bré f̀éé. M̀ú sv aní iwí latin.

¹¹ Igyí òhapú okugyíòku telí b̀ó afòdiε oloku òkule amu ekekegyíεke. Afòdiε-abòtó á mú ó tenyá p̀úbó m̀ú tsé dú tsé lafa ámu kén òtòp̀úbó m̀ú ní. Támε afòdiε ánfi méetalí lé ahá tsú amú lakpantò ekekeεke. ¹² Kristo m̀ú lénya b̀ó lakpan iwí afòdiε òtsáwule pé ámu a, ùeta f̀éé, oleyétsiá Bulu gyòpísv. ¹³ Tsú alí bré ámutò òpá otsie inu ogyo bréá Bulu òbòp̀v mu alupú bwé mu ayabi oyíkpa. ¹⁴ Mu afòdiε kule pé ámu ilahá ahá á mú ó Bulu lapó amú bwé mu kle amu bafun ha bré f̀éé, òlala kukukuku itráa ma amú iwí.

¹⁵ Òηε Wankíhéhé é légyi m̀ú iwí adánsie súná aní. Olegyankpá blí ðbéε,

¹⁶ Aní Wíε ðbéε,

“Ntam anfi obétsiá mía amónyò nsuné,
bré á mú ó íbá ámutò ní.

Nópv mí mbla wá amú kluntò,

wánlín m̀ú wá amú nwuntò.”

¹⁷ Òletrá blí ðbéε, “Mmétrá káín amú lakpan p̀ú amú lalahεsv ekekeεke.” ¹⁸ M̀ú sv ní Bulu lasí lakpan kíé á, m̀ómú m̀ú iwí afòdiε kuku itráa medéhián ε.

Mliha Akpukpe Manta Bulu

¹⁹ Ínu sv mí apíó, Yesu obugya amu sv aníbv òkpa wíε òsúsú Òwankíkpátò Òwankíkpá inu faan. ²⁰ Mu lowu ámu sv alafínkí tati á mú ó b̀òp̀vká obu ámutò ámu há aní. M̀úgyí òkpa p̀òp̀wεá itehá aní nkpa ní. ²¹ Aníbv Bulu igyí òhapú òhεn k̀p̀ònk̀p̀ònk̀p̀ònti òkúá òde Bulu ahásv kí. ²² M̀ú

sv mliha apv uklun ání ibv ðnakwalí, pú hógyiá mú ðnó bu ðnlun kpukpe manta Bulu. Tsúfé alapú Kristo obugya gyóra aní. Aní klun méetrá ha aní pón, alapú ntsu wánkíhé é fwí aní iwí. ²³ Mliha akíta tó ámúbú anidé mú iwí adánsie gyí, anidé mú ðkpa kí amutò kínkín, tsúfé ðnakwalupu Bulu gyí. Òbóbwe tóá òlehie ání móbwe há aní. ²⁴ Mliha akí alíá íbóbwe abówa aba ðwvnlín, òdwe múa yilébwetò. ²⁵ Mlumáha asi aní ofiakpa yò, fé alíá akv budebwe. Mboún mliha atra wa aba ðwvnlín tsíá. Tsúfé mlidéwúun ání aní Wíe òbáke ámv idekpukpé bá.

²⁶ Mí apíó, lakpan iwí afòdie kuku itráa ma unv há aní, ní akí ansí bwé lakpan bréá anulabí ðnakwalí amv. ²⁷ Mboún tóá ilasí gyí, abétsiá ifúsú gyo Bulu asún ogyíké pú ogyá kpònkpònkpònti ámúbú íbòhò Bulu alupó ámv. ²⁸ Ní ahá abanyó-abasá begyi òkv iwí adánsie, ání alakíná Mose mbla ámusv gyí a, butómó mv. Butamawun mv nwe. ²⁹ Múmú ní òkv òkí Bulu mv Bi ámv ansítò kótíkótí, omobu ání mv obugya amúbú Bulu lópusí mv ntamsv, ilogyvraa mv iwí ámv bu íbíá, olesia Bulu awitòle Ìjé ámv mú á, mv ísvbití ání òbéhie nyá méeba kí. ³⁰ Tsúfé anyin ání Bulu léblí òbéé, “Mí, mli Wíe téká lalahé íkò. Mí òbéka aha lalahé akò amú lakpan sv.” Òletrá blí òbéé, “Mí, mli Wíe obégyi mí ahá asún.” ³¹ Ibv ífú ání fékpa wíe Bulu ðkiankparv amv agblátò.

³² Mlumátan bré ámúbú Bulu wankí lówankí wólí mlísv ámusv. Mlíkaun ání alí bré ámutò á, mlílòtsun iwíəsun tsòtsòtsòtò, táme mlílélú kínkínkín. ³³ Betsiá síá mli, wá mli iwíəsun ahá ansítò. Bré kvto é á, mlílétsa ahá ání bude iwíəsun ámv odu wúun. ³⁴ Mlílósú ha obu adípú. Bréá ahá bəpv ðwvnlín swíí mli ató á, mlílési há amú ansigyísú. Tsúfé mlíyin ání mlíbv atóá íbv alé dvn mú, íbétsiá bré féétó. ³⁵ Mú sv umákpən mli. Mlíkíta iwí, amlílu kínkín, tsúfé mlíbv íkòká kpònkpònkpònti Bulu wá. ³⁶ Ilehián ání mlótomi, méní mlétalí bwé Bulu apé, fówun mlénya

itō ámúbú Bulu léhie yáí há mli ámu. ³⁷ Tsúfé bōwanlín wá Bulu ason wanlínhé amotō bæ,
 “Iméegyí nke kuku Bulu obówotií.

Ḑmóowa ḑpá.

³⁸ Ahá ání amúbú hógýi su Bulu latsú amúbú ání amúbú asón da
 ḑkpa obétsiá nkpa.
 Táme ní amótó ḑku mówa klun kítá iwí mu hógýitō,
 oleyinkí ḑma mú á,
 Bulu ansí méegyí mu iwí.”

³⁹ Táme anumégyí fé ahá ání badámlí ḑma há Bulu, bafwí.
 Mboún anigýí ahá ání amúbú hógýi laho amúbú nkpa.

11

Hógýi

¹ Hógýi gyí ansí pudínká tóá fumókówun, táme fude mú ḑkpa kísu. ² Ahá amúbú betsiá bímbí ámu hógýi súbú Bulu ansí légyi amúbú iwí.

³ Aní hógýi súbú anilébi ání asón Bulu léblí púlé ḑyí. Mú su tóá ansíbi towun ledalu tsu tóá ansíbi tamawuntō.

⁴ Hógýitō Habel lópu mu atō hahé ání ibu alé dun mu dehen Kain klé há Bulu igyí. Mu hógýi su Bulu ansí legyi mua mu atō hahé ámu iwí, olotsu mu ání mu asón da ḑkpa. Ibo mútótá olowu dodoodo, táme mu hógýi amu su ḑtráa ḑdetáí bəfɔn nde.

⁵ Hógýi su Enok mówu asa Bulu lótsu mu, ḑhaa mówun mu. Bulu ason wanlínhé legyi mu iwí adánsie ání olegyi Bulu ansí asa olotsu mu náti. ⁶ Mlki, ḑhaa méetalí gyi Bulu ansí ní ḑmōho mu gyi. Tsúfé ilehián ání ḑhá ání ḑbéba Bulu wá obóhogyi ání Bulu bu mu, ḑteká ahá ání butodúnká mu ikō.

⁷ Hógýitō Noa lónu asón ání Bulu lébláa mu tsú tóá umókúnyá ba iwí. Olobu Bulu, sré dáka kḑonkḑonkḑontí, púhō mua mu wóyító ahá nkpa, bréá ntsu lōbulá. Mu hógýi

amu sù òyító ahá begyi pón, òlòbwe òhá ání mu asón da òkpa Bulu ansító.

⁸ Hógyi léha Abraham lóbu Bulu bréá Bulu lébláa mu òbéé, òdáli mu òmátó, òyò òsulúv ání mu Bulu léhie há musu. Òlenatí dáli mu òmátó, omeyín òtínéá òyó. ⁹ Hógyi léha òlòyòbwe òfó òsulúv amú Bulu léhie yáí há mu amusu. Tati-obuto oletsia ínu. Alí kén Isak mua Yakob ání Bulu léhie òsulúv amu yáí há é betsiá tati-mbuto òsulúv amusu ní. ¹⁰ Tsúfé Abraham létsiá tati-obuto, ogyo wúlu kpònkpònkpòntiá Bulu léda, imóobwie ekekekeke.

¹¹ Hógyi léha Abraham mua mu ka Sara benya obí kwíí. Ibu mótó ání badan tsun ikwíusu, Sara é ménya ikwíí. Abraham lóhogyi ání Bulu obégyi tóá alahíé yáísú. ¹² Ínu su òmá kénín ání buma iklátò, butso fé ntsrakpabi ntéé òpu ònó isí belin tsu Abraham ání aladan tsun ikwíusotò.

¹³ Hógyitò ahá ánfí féé bowu. Ibu mótóá amó ibi meda atóá Bulu léhie yáí há amó asa bowu. Táme bowun mú sísí, amó ansí légyi mú iwí. Botsu mú ání afóó pú òkpa atupú bugyi òyí ánfítò. ¹⁴ Ahá ání botsú mú alí budele súná ání bude òmá ání ibóbwe amó onutó klé dunká. ¹⁵ Ní bude òmá amúv bedali tsu mótó ámu iwí susúu a, teki bodunká òkpa yínkí yó ínu. ¹⁶ Táme òsúsú òmá ání ibu akíle ònu mú amúv bedali mótó ámusu amó ansí ònu. Mú su uma Bulu péli ání bétí mu beé, amó Bulu. Tsúfé alalá wúlu kpònkpònkpònti ku yáí há amó.

¹⁷ Hógyi léha Abraham lékitá mu bi Isak òyòbò afòdié há Bulu bréá Bulu lóso mu kí. Ibu mótóá obí ánfí Bulu léhie mu ání òbókúwí ní, táme òmòtswe mú kpúkpu. Òlòkusu pú mu bi òkòkónú òkule amu òyòbò afòdié ámu. ¹⁸ Ibu mótóá alí bré ámutò á, Bulu labláa mu òbéé, “Fú bí Isak abí-aná òbóbwe fú abí-aná ní.” ¹⁹ Táme Abraham lótsu mú ání Bulu òbétalí tsínkí Isak. Lélé mú, òkpa òkusu á, òlélanyá Isak fé òhá ání Bulu lakúsóa tsu afúlitò.

²⁰ Hógyi léha Isak lóyulá mu atabí Yakob mua Esau. Mu ansí dñ aní Bulu óbóbwe tóá ðelehie há amó ekekú.

²¹ Hógyitò bréá Yakob óbá bowu á, oloyulá Yosef abi anyò ámu, olobun mu oyi yíáhésu súm Bulu.

²² Hógyitò bréá Yosef óbá bowu á, ðleblí óbéé, Bulu óbéle Israelfó tsú Egipte ómátó. Mú sv ðleda amú ólá óbéé, bumási mu awú tswi mu.

²³ Hógyi léha bréá bəkwí Mose a, bəpu mu ɣáín tsra asa. Tsúfé bowun aní óbu akíle. Mú sv bumenya owíe amu mbla aní ólwa tswi ifú.

²⁴ Hógyi léha Mose lékiná aní bumátu mu Egipte owíe mu bi tsíhé mu bi bréá óledan. ²⁵ Olotsulá aní buwáa mua Bulu ahá iwíəsuntò, dñ aní obénya lakpanbwe iwí ansigyí bré itinbí. ²⁶ Olotsulá aní busópa mu Kristo sv. Tsúfé íbéhie wá labi há mu dñ aní obénya Egipte atonyahé féé. Mu ansí dñ ikóá Bulu óbéka mu ekekúsú.

²⁷ Hógyi léha Mose lénatí Egipte ómátó, omenya owíe amu óbló ifú. Mu ansí dñ Bulu aní óhaa tamapú ansíbi wunsu. Mú sv olotomi, omeyinkí óma. ²⁸ Hógyi léha mu óleha Israelfó befi Katsun Nke gyí así. Óleha amó bəpu obugya kpá amú obu-ónó, méní Bulu-óbəpυá ótómó ahá ómóəpu íbi da amú bití.

²⁹ Hógyi léha Israelfó bətsun Əpu Pəpə amutò fé ósulúw wulihəsv búna. Táme bréá Egiptefó é bəe abətsun a, əpu amu lékitá amú.

³⁰ Hógyi léha Israelfó benatí bómlí abuntí aní bəpυgyi íban wá Yeriko wúlu nkensíénó, ílobwie bun gbloo.

³¹ Hógyi léha obu-ónó otsiápú Rahab mówu tsía ahá aní buməhə Bulu gyitò. Tsúfé óləhə Israelfó ansí awakupu afóó wankláán.

³² Ílehián aní nétrá wanlín íku é? Bré mətsó aní nówanlín Gideon mua Barak pú Samson, Yefta mua Dawid, Samuel mua Bulu ónósú atáipú amu hógyi iwí asún.

³³ Hógyi léha amú bəkə ómá-ómá gyi amúsú, bəbwe tóá ida

okpa. Benya atóá Bulu léhie há amú, beha agyatá ndato lekli. ³⁴ Bodun ogyá kponkponti, bumesin isa. Hógyi léha amúá bəpon benya əwunlín, amú aku benya ikó túmi, gyi amú anyabásó. ³⁵ Bulu létsinkí atsi aku afúli há amú. Ahá bepítí amú aku ató alu mó amú. Mú óó á, bumotsulá kíná Bulu. Iłwa amú ədweá bómə amú dvn ání bəyinkí Bulu əma, méni Bulu əbókusúa amú, bənya nkpa ání ibu alé dun.

³⁶ Bəbwe amútó aku ahinlá, pítí amú mpli. Bəwa amú aku ikan, pú amú tswi obu. ³⁷ Bəda amútó aku abwi mó, pú sáa bóí akotə, aku é besin ədayí ənó. Amú aku é bədi akúfa múa akpaláa nwalú-kpákpátó nátí kí, aku bədi akón. Bədinká akusu, wá amú aku é iwəsuntə. ³⁸ Teki megyí əyí ánfí odutə ahá ánfí bətsiá asa. Adimbító múa abusu bənátí kí fé əkun abəpú, tsíá dí abwi alato múa mbótó.

³⁹ Amú hógyi sú Bulu ansí légyi amú féé iwí. Əkoku ibi meda tóá Bulu léhie yái. ⁴⁰ Tsúfé atóá ibu alé, ibówa labi iwí Bulu lóbwe agywun yái há ania amúnyə féé. Mú sv amú nkule buméetalí nyá mú, yófun bréá Bulu labwé ania amúnyə féé anılafun mv ansító.

12

Anı Sí Bulu

¹ Anıbu ədəm anfi bəpu hógyi tsíá ánfí odu bómlí anı. Mú sv mliha anı é atswi tógyítóá ide anı bitía ya əma pú lakpan ání ilakıklı anı kinkíinkín tsalıfwı, atomi tsii əsrú amúv ida anı ansító ámv. ² Mliha apv ansı dınka Yesusu. Múgyı anı hógyi nfiası pú mú ənómə. İniá oyin ansıgyı oduá ida gyo mv sv á, olotomi wun ipian oyikpalíhesv wú. Omobu kpóí ání bókpoı mv tətə, alayó otsie Bulu owíe obía ámv gyəpısv.

³ Mlıpəki ipian ání olotomi wun lakpan abwəpú ıbtə, bréá bolu mv, wá mv iwəsuntə, méni əyé méeta mli, mlıméesi mv hógyi. ⁴ İwiá mlıdépri le iwı lakpantə á,

mlumókútálí pri yófun bréá mlési mli nkpa há. ⁵ Mlumátan itói ání Bulu lótoí kplá mli ánfí mligyí mu abísú. Òbée, “Mí bí, ní nebití fú isu á, máhò mú lalahè sv. Ní nòwá iyun wa fu á, máha mú ikpòn fu.

⁶ Tsúfè òhá ání ntòdwé á, mu ntòwá iyun wa.

Òhá ání nàpòbwé mí bí á, mu ntebití isu.”

⁷ Tomi wun ipian fé isu bude fú bití. Bulu dé mli isubití fé mu abí. Tsúfè obí òmòmú bu invá mu sí tamabití mu isu? ⁸ Ní òmèbití fú isu fé aliá òtòbwé mu abí fèé á, idesuná ání megyí mu bi onutó fúgyi, klétobi fúgyi mu. ⁹ Aní òsulúv anfisv así butebítí aní isu, anitobú amú é. Ntogyi sù animóotsulá ba iwiasí há aní Sí Bulu òvñ amú, anya nkpa ání itamatá? ¹⁰ Bré itinbí pé aní òsulúsv así butòpòbití aní isu aliá budeklé. Bulu mú á, aliá abówa alé sv òtebití aní isu, ménì aní é aní iwí bétin fé mu. ¹¹ Ní bude aní isu bití á, itehan aní ali bré ámvtò. Ansí tamagyi aní. Táme isubití ámu òma a, anitòbwé yilé, tsíá iwilwiitò.

Atosunáhé Pú Òláda

¹² Mú sv mluhá abato iwu mli, akpawunutò ikpunkì mli. Mliwa iwí òwònlín! ¹³ Mliha mli tsiátò iwa alé, ménì abubúpv amv buméesin tsukvle, mboún bénya ilotsá.

¹⁴ Mliò mbódí amlíha iwilwii itsia mliha òhagyíòha nsiné. Mlitsia nkpa ání mú iwí letin, tsúfè òhá ání mu iwí métin móowun aní Wíe. ¹⁵ Mlíki ání mlitò òkukvuku móòhulú Bulu awitòle amv. Mlitò òkuku é mási asún wá mu klvntò, ménì òmòòpv asún wá mli nsiné, iyinta mlitò akv. ¹⁶ Mlíki ání mlitò òkuku é móòbwe mu iwí mbua òtòpò, ntée òhá ání òtamabú Bulu fé Esau. Múlòpv mu hande tse òtsáwvle atogyihè. ¹⁷ Fé aliá mliyìn yaí á, òma a, olobodunká obi dehen oyúla tsú mu sí wá, táme mu sí lékiná mu ha. Ibv mútòá òlehie su kokóli mu sí, táme omenya mútò òkpa.

¹⁸ Megyi ibvá mlétalí pv ibi da así mlilaba. Òtínéá oklún tuun pú afú kpònkpvònkpvòntì bu, ogyá é idetsíí fé Sinaibu

ámú Israelfɔ ɔɔɔ mú asi bréá Bulu dépu mu mbla há ámu ámu asi mlilaba. ¹⁹ Inó bonu ɔkpe lɔfulí kóklúbúkú, bonu ɔme kpɔnkpɔnkpɔnti ku lelun bláa ámu asún, su bokokóli beɛ itsía alí, bumedékléá betrá nu asvansu. ²⁰ Tsúfé bumetalí gyí mbla ámu Bulu lówa há ámu ɔbéɛ, “Ní ɔbwi ɔku kúráá iwí ida ibu ámu a, budáa mu abwi mɔ” ámusu. ²¹ Tóá bowun unv lówa ámu ifú. Mú su Mose óó léblí ɔbéɛ, “Ifú lahá mí ndekpinkí!”

²² Mli mú á, Sionbu asi mlilaba. Bulu ɔkiankpapu amu wúlu yilé, igyi ɔsúsú Yerusalem pú Bulu-abɔpu mpím-mpím ansí ogyíkpa mlilaba. ²³ Bulu bití ámu abí, bgyi ahá ámu bawánlín ámu adá ɔsúsú ámu ofiákpa mlilaba. Bulu, ogyi ahá féé asún ogyípú amu wá mlilaba. Mlilaba ahá ámu Bulu latsú ámu ání bafun amu akláa wá. ²⁴ Yesu wá mlilaba. Mgyi Bulu mva anyánpúsa nsiné ntam ɔma ɔlípú ni. Yesu obugya wúnyáhe ámu ɔlɔpu yilé ba dun Habel obugya amu wá mlilaba.

²⁵ Mú su mliki wankláán, méni mluméekiná Bulu ámu ɔde mli asún bláa ámu. Tsúfé Israelfɔ ámu bekiná asún áni ɔlɔwa Mose blí Sinaibu asi nu ámu bumetalí srí sí ɔsubití ámu. Ní aní é akíná ɔhá áni ɔdetɔí tsú ɔsúsú áni ɔme nu á, aní ɔsubití bódun ámu klé. ²⁶ Bréá Bulu lótoí Sinaibusu á, mu ɔme léha ɔsulú lekpinkí. Táme séi á, alahíé ɔbéɛ, “Nétra kpinkí ɔsulú ɔtsáwule, kpinkí ɔsúsú é tsía mótó.” ²⁷ “Nétra kpinkí mú ɔtsáwule” aní idesuná áni Bulu ɔbékpinkí atɔ bwehé ámu, lé mú unv. Tóá uméekpinkí ekekeke pé obésian.

²⁸ Mú su mliha ada Bulu ipán. Tsúfé iwíegyí áni uméekpinkí abénya tsú mu wá. Mliha abu mu, anya mu ifú, méni abégyi mu ansí. ²⁹ Tsúfé lélé mú á, ogyá aní Bulu ámu gyí, ɔtoho atɔ plíplíplíplí.

¹ Mlíkita mli aba Akristofó dwetó kínkíínkín.
² Mlumátan afóóhəsu. Tsúfé múléha aku bəhə Bulu-abəpu afóó, uməwankí amú ní. ³ Mlíkaun obu adipúsú, fé mliá amónyó dá obu. Mlíkaun ahá ání bude iwəsun wúunsu, fé mliá amónyó dé iwəsun ámv wúun.

⁴ Akúlu mba aká bubúu aba amú abatsiátə. Okuku mádali mu ba əma, tsúfé Bulu əbébití ahá ání buda ahá ání bumegyí amú akúlu ntée amú aká wá, pú mbua atəpú féé isu.

⁵ Kóba asún umádun mli ədwe wa. Tóá mlibu igyí mli ansí, tsúfé Bulu lablí əbéé, “Mméenatí sí mli, ntée kíná mli ekekeke.” ⁶ Mú su abétali wá klun blí aniaa, “Mí Wíe Bulu gyí mí əbuápu.

Mú su tətə móəwa mí ifú.

Ntə nyankpusa əbétali bwé mí?”

⁷ Mlíkaun mli nkpa agyápu amú begyankpa bláa mli Bulu asún ámvu. Mlíki aliá bəpútsiá, amlunya hógyi fé amú. ⁸ Ali amúú Yesu Kristo gyí igye ámv a, ali ógyi nde, ali kén obétsiá bré féé é ní. ⁹ Mú su mliháha atosunáhé ətsan-ətsan igyí mli ansí, ibitia mli le əkpa wankláán ámvu. Ibu aléá mléha Bulu əbówa awitəle há mli əjéto əwənlín, megyí atogyihe mbla, ání itamawá labi kuku há mósú agyípúsu gyí.

¹⁰ Anibu afədie-asubwi kuá igyí ahapó amúú beha Bulu igyí əsulúsu nfi ámv buma əkpa gyi mósú ató. ¹¹ Bulu igyí əhapú dehen təpú mbwi obugya wíe Əwankíkpátə Əwankíkpá unv yóbə amú lakpan iwə afədie, butəpú aye amv mú ya mmuátse, yówa mú ogyá. ¹² Inu sú Yesu é lówu mmuátse, méni əbəpu mu onutó obugya gyúra mu ahá, amú lakpan su ní. ¹³ Mú su mliha adali yə mu wá mmuátse unv, abukpəi ania mnyə. ¹⁴ Tsúfé anumá wúluá ibétsiá yó əsulúsu nfi. Anigyó wúlu amúú ibá ámv. ¹⁵ Mú su mliha atsun Yesusu akanfu Bulu, iwə afədie ání anidəpvhá mu ekekegyíeke. Múgyí ənotó asún ání anidəpəwá anu Wíe

numnyam ni. ¹⁶ Mlumátan awitolewasu. Mliye mli atótó ha aba, tsúfé mú aná gyí afodieá itegyí Bulu ansi ní.

¹⁷ Mlibu mli nkpá agyápu, amliba iwiasí ha amó. Tsúfé butamadá okpónó mli oklásukú su. Buyin ání béyele aliá bopuki aní oklásu onó Bulu ansító. Mliha amó abubwe amó agyómá ansigyísó, megyí nwesu. Ní megyí ali á, umówa labi kuku há mli.

¹⁸ Mlitsia bō mpái ha aní. Nyin ání aní klvn medé aní pón ha, táme anidékléá abétsiá tsiátó wankláán brégyíbré.

¹⁹ Nhíé ndekléá mlibóó mpái, Bulu oháa mí ansanki ba mli wá nkenyó ánfito kótóó.

Mpái Tráhe

²⁰⁻²¹ Iwilwii Ohapú Bulu, olokusúa aní Wíe Yesu Kristo tsú afúlitó ámu oháa amlitali bwe yilé kugyíkúvá odeklé. Nde mu kokóli mbée, otsúvun Yesu Kristosu obwe tóá odeklé anitó. Yesu gyí akúfa Okpapú kponkpontíá Bulu lópu mu obugya ká ntam amúú ibu unv bré féeé, mua mu akúfa, bvgyi mu ahá amu nsiné ní. Numnyam ibwée mu kle yófun bréá itamatá! Amen.

Ikla

²² Mí apió, ibv mótóá owuló kútúklú nawánlín sísí mli. Táme nobwíí ipa, mliyaa asu amlinu mótó asón ání ndepwá mli owunlín. ²³ Nde mli ibi ha ání balé aní pío Timoteo obu. Ní olówa osa bōtu mí nfi mó á, nékpa mu abéba beki mli.

²⁴ Nehá mli nkpá agyápu pú Bulu ahá atráhe féeé itsiá. Akristofó amúú bubu Italia omátó ámu é behá mli itsiá.

²⁵ Nde Bulu kokóli mbée, owáa awitole ha mli féeé! Amen!

Bulu ntam pɔpwe; Nkonya
New Testament in Nkonya (GH:nko:Nkonya)

copyright © 2010 Wycliffe Bible Translators, Inc.

Language: Nkonya

Translation by: Wycliffe Bible Translators, Inc.

Nkonya

nko

Ghana

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nkonya

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 13 Mar 2019 from source files dated 13 Mar 2019

01b09958-fa53-51d1-aae0-88c7e9302503